

明代傳記叢刊・學林類⑩
周駿富輯

啓禎兩朝遺詩小傳

十卷

(清)陳濟生撰

明文書局印行

啟禎遺詩自序

己亥夏予所論定兩朝遺詩告成而序之曰聲音之道關乎氣運讀啟禎以來諸公之作而不禁爲之唏噓而欲絕也虞后之言詩諧聲和律以格神人暨乎雅頌之作登歌清廟意主乎溫柔敦厚而已王風漸降變雅聿興其愍時傷亂幽墨憤邑之情間託於艸木禽魚以見志非幽厲以下之詩人不能爲和平大雅之音也時有所不能而勢有所不可也離騷之作詭竒沉痛不可方幅而忠君愛國纏綿思慕至于惜往日悲回風朱子謂其隨事感觸油然而有忠孝之意假使當讒賊萌芽家國覆亂之時而爲優柔紆緩之

調亦何異于處清明淳厚之朝而獨爲涕洟蹙蹙之
狀也哉啓禎以來理學節義名臣偉儒國史家乘彰
彰可攷人不必以詩傳而詩則以人重其間奄豎煽
虐則至甫曹節之禍未有烈於此者也么魔犯闕九
廟震驚則侯景黃巢之亂未有過于斯者也若夫乙
酉建國上無東晉之強下無南宋之久疆土人民一
朝淪喪貞人烈士捐軀赴義陷脰絕胸則又有所南
信國之遺風焉蓋生當承平之世上之雍容朝廟無
所見其危苦激切之情下者嘯傲委蛇無所發其牢
愁結轡之氣故其爲詩攄心縱筆妙合自然及夫身
世艱危國家板蕩疾痛慘怛情見乎詞卽讀書樂道

之士無不激昂奮迅於其時者嗚呼治亂存亡之間亦可以感矣集中諸作格體非一工拙亦異至其發乎性情止乎禮義幽思而不傷怨誹而不怒其有合于風騷之意則一也予故釐爲數卷而較定之或曰子之持論則是矣其有未罹奄禍及不死于申酉之難者而子皆錄之何也子荅之曰夫子刪詩不遺曹衛而景差宋玉皆得以文詞附屈子之書集中所存要皆品節文章卓然可傳於後世庶幾讀是書者無媿於知人論世之旨也

長洲陳濟生定齋謹識

天啓崇禎兩朝遺詩 自序

兩朝遺詩凡例

一是選以人為重人以節義為主以觀近代有三大
事乙丑丙寅之際罹逆奄禍以死者一也崇禎昔
殉國者又一也乙酉以還潔身死者又一也凡此
諸公皆兩間正氣一代偉人特首錄之至數十年
間或理學紹古或經濟匡時或正色立朝直言忤
主孤忠大節易地皆然故次錄之他如磊落之才
未登仕籍文章之士淪棄山林羽儀所存知交多
有則以是終焉共得八卷衡量之間寧嚴不濫事
緣實著人以類從

一明詩選本不下數家近日錢宗伯列朝詩出已具

大觀茲於世遠者槩不復及惟通籍在萬曆以還
捐館在天啓以後上自先文莊師友一輩以至不
佞濟生交與之間數十年中約略具載至於當世
人文蔚興刪刻奇賞茲不混入

一三大事諸公多四方之產河山阻絕重以兵戈搜
訪有心郵筒莫致或僅嘗寸鱗或未見一斑今就
篋中所存先付刪削尚期海內同人共懷棄好各
出祕藏以光風雅

諸君子人各一集集系一傳或取之奏疏語錄或
取之豐碑行狀所採錄者止生平大節其行誼細
微生卒年月不無闕略尚圖搜輯續所未備

一同時諸君子有有文無詩者悉于他傳中附見以志景仰海內秘本遺編或屬家珍或存友筭望悉賜郵寄補入成書

一第一卷天啓間死當禍者二卷崇禎甲申死難暨在任在籍先後死者三四卷乙酉以後殉節者事跡雖異忠義則同第或傳聞有漏歲月未詳期共釐正以佐不逮

一第五六卷先達理學經濟品節文章暨天啓許璫逮黜者悉遵科次成編七八卷自啓禎來高士名賢知交氣誼或簡存舊帙或徵求秘冊大都未經傳播即吉光片羽亟願表章至如程孟陽李長蘅

詩固作手人亦高流因錢宗伯收之已備重複則無取補遺又不必若雲間之董陳竟陵之鍾譚近世競宗之人誦其篇家有其集亦無俟余之採錄也凡有關遺多如此例

一 是選始於癸巳成於乙未詩到隨選隨刻有始僅見數首或數十首收之稍寬及得全集覺前多濫既已刻成遂不復削有本不工詩偶得一二欲存其人不計工拙當分別觀之

長洲陳濟生述

天啟崇禎兩朝
遺詩小傳

天啟崇禎兩朝遺詩 小傳

012-009

天啓崇禎兩朝遺詩 小傳

高忠憲公

先生諱攀龍字存之號景逸晉江無錫人進士
語侵時相謫揭陽典史天啓初舉為太僕寺主簿歷
至都察院左都御史會逆奄用事羣邪附之興鉤黨之獄目先生為魁罷
歸削籍尋被逮先生遂赴水死烈皇登極逆奄伏誅乃贈太子少保兵
部尚書益忠憲事載國史不具論論其學術先生之學以性善為宗以居
敬格物為要以躬行實踐為主以綱常名教為本少即從事于聖賢之學
其為行人時有妄人上章詆毀程朱先生有崇正學闢異說一疏力排斥
之其謫揭陽也自謂猶不能不動心遂大發憤曰此行不徹此事真負此
生矣在途拜周元公李延平祠覽朱文公蔡九峰遺蹟慨然有繼往哲之
志所至與儒者許敬菴李見羅蕭自麓諸公往復辨論在官舍編集朱子
要語先生自謂此行學凡三進會同邑顧端文公倡道東南錫山故有龜
山先生東林書院先生歸遂與顧公修復遺址講學其中毘陵錢啓新先
生亦時來會講先文莊從錢遊嘗得侍先生海內清流之士羣相應和一
時以為絕盛由是東林之名大著為太常少卿時上疏陳聖明務學之要

謂大學一書既講于經筵宜反覆玩味真德秀大學衍義丘濬大學衍義補不可不觀帝王心法治法具備于此爲太僕卿時有邪黨請禁講學於是憲臣長安馮公吉水鄒公皆去位先生疏調講學何事頓空法紀之臣禁學何名發自聖明之世言極切直蓋欲以學術救世至以身殉道而不顧及臨難從容具遺表不辱國不忘君別友人書曰一生學問到此亦少得力嗚呼難哉先生凡在林下二十餘年博覽諸儒別其淺深同異旁及二氏之書亦反復詳究而得其病之所繫嘗言姚江誤看紫陽窮理立論偏重遂使學者調讀書是徇外空疎杜撰一無實學又曰陽明以朱子之致知爲聞見之知故其爲宗旨曰良知吾則以謂大學致知本非不良之知也又曰無善無惡之說以之明心性者十之一以之滅行簡者十之九蓋先生祖孔孟宗程朱而折衷羣儒之言心悟而力行之故旨約而該言辯而核通智愚以爲教而無弊蓋朱子集宋諸儒之大成先生于本朝諸儒亦可謂集其大成者矣先生學兼體用正人君子咸以王佐期之厄于百六未展其蘊今遺書行于世者十四卷詩居其一詩無意求工大約抒寫自得之致錄之以見理學家之詩章異于騷人者如此

楊忠烈公 左光斗附傳

公諱漣字文孺別號大洪德安應山人萬曆丁未進士授嘗熟知縣考功
取擢入諫垣歷轉兵科都給事中天啓初告歸起禮科都給事中歷太常
少卿都察院左僉都御史陞副都御史削籍歸尋被逮卒于詔獄崇禎初
贈公太子少保左都御史諡忠烈事具國史且昭灼在人耳目兒童走卒
無不知有楊大洪者今撮其槩公之功莫大于移官一事節莫壯于効瑞
一疏而卒以此死當國統再絕官府危疑舉朝惴惴不知所爲公以七品
官儼然行顧命大臣之事不避艱難不計禍患卒之官闡之毀消而冲主
之位安方之呂端鎖閣韓琦撤簾功殆不減而羣小忌之目爲貪功至二
十四大罪之疏上而忠賢銜之刺骨不殺公不止群小之媚璫者謂移官
之名甚正難以爲罪于是誣以贓謂公受經略熊廷弼賄逮繫拷掠至死
備極楚毒嗚呼庚申九月之事誠震動朝廷然當土少國乏之時使舉朝
之人皆畏罪避嫌袖手坐視御史左光斗所謂武氏之禍安知不遂見于
當日哉公惜國家於泰山之安而身反爲叢射之的卒以此基禍在公危
身以濟國雖死何憾獨不知外廷諸臣誠何肺腸而必欲與被彈劾懷怨

毒之逆奄交讎而共殺之也時與公同逮同歿于獄者都察院左僉都御史桐城左光斗滄嶼吏科都給事中嘉善魏大中鄺園太僕少卿臨清周朝瑞衡臺掌河南道御史武定袁化中熙宇陝西副使嘗熟顧大聖聖客魏給事別有傳其四人皆與公同年進士當熹廟之初以御史與公同心協謀清官禁安社稷者左公也以禮科給事中抗章極論有借叢指鹿等語觸魏奄客氏之怒者周公也力攻訐奄之私人科臣傅槐者又左公也贊公上劾璫疏者又左公也公疏入得嚴旨繼公上章謂灰正直之氣長奸璫之志恐流毒縉紳遺禍皇上引馮保爲戒者袁公也以刑部員外議遼東經略巡撫之罪謂經罪薄于撫又大司寇王紀疏攻客氏或疑其代草疏者顧公也于是羣小與逆奄合謀借封疆一案以汪文言之獄聯牽連舉六君子一網盡之自是削斥逮捕天下清流之士大抵皆不免矣烈皇卽位逆奄誅追錄罹禍忠臣贈左公副都御史周公大理寺卿袁公顧公皆太僕寺卿弘光時追謚左公周公皆忠毅袁公忠愍顧公裕愍詞績徵諸公詩集附載首卷要之忠烈公亦不以詩名錄一二以存其人云爾

魏忠節公 附 孝子學泚

公諱大中字孔時別號廓園嘉興嘉善人萬曆丙辰進士授行人歷官吏科都給事中天啓中璫禍作逮下詔獄公獨介剛毅雅有澄清天下之志爲諸生時家酷貧至不能舉火泚巷數椽上漏下濕晏如也嘗師事高忠憲公始舉于鄉家人爲製新衣冠棄弗服爲孝廉六年于當道未嘗有所干謁在諫垣謝絕中外苞苴彈劾不避權貴遘左失事之家朝廷初欲處楊熊以不死公執法與司寇爭謂不當末減凡臣下請卹稍濫者一切以故事裁之有餽遺者發其事而斥之于是羣小側目畏忌公甚時魏奄初用事於內而外廷猶人才濟濟高邑趙公爲太宰忠憲公爲御史大夫應山桐城爲中丞相引重武定新昌皆在要職而公長首垣以激濁揚清爲已任天下仰望太平公長子學泚喟然歎曰無根之華其能久乎自里中寓書于公曰一時碩彥盡在雄豔之地天欲以此開中興耶抑將蘊陷正人之禍而速之墜也因以閒居樂志爲諷公得書曰豈不懷歸勢不得獨潔耳會應山上疏罪狀逆奄公繼之抗章極論奄銜之尋值晉無缺會推謝應祥蓋高邑自以才望用之也而忌公者以謝嘗令嘉善于公有